



14 JAN, 2025

TNB belum cukup tajam

Utusan Malaysia, Malaysia



TNB belum cukup tajam

PETALING JAYA: Ketua jurulatih Tenaga Nasional Berhad (TNB), Nor Saiful Zaini Nasiruddin mengakui banyak kelemahan yang perlu diperbaiki pasukannya walaupun melakar kemenangan besar 5-0 terhadap Liaoning Hockey Team dalam aksi Liga Hoki Malaysia (LHM), kelmarin.

TNB yang sebelum ini turut mencatat kemenangan besar apabila menewaskan TNB Thunderbolts 7-3 minggu lalu dalam aksi liga, namun ia masih belum dapat memuaskannya hati bekas jurulatih skuad remaja negara itu.

“Penyudah kita agak tumpul, kita ada banyak peluang. Pada aksi pertama kita main menentang THT (Pasukan Hoki Terengganu), kita ada banyak peluang tetapi kita tidak menjaringkan gol.

“Sepuluh minit pertama (menentang Liaoning Hockey Team) kita ada peluang untuk menjaringkan tiga hingga empat gol tetapi bola itu bukan terus keluar... terkena tiang, diselamatkan penjaga gol.

“Mungkin ada pemain yang boleh diperbaiki lagi bagaimana nak menjaringkan gol, ini yang penting,” katanya.

Saingan di Stadium Hoki Nasional Bukit Jalil menyaksikan TNB membuka tirai jaringan pada minit ke-12 menerusi pukulan sudut penalti Syed Mohamad Syafiq Syed Cholan sebelum Jang Jong Hyun menggandakan jaringan ada minit ke-21.

Gol ketiga TNB disumbat oleh Nik Muhammad Aiman Nik Rozemi hasil gol padang pada minit ke-38 sebelum Azrai Aizad Abu Kamal menambah derita lawan pada minit ke-45. Gol kelima TNB dijaringkan Norsyafiq Sumantri tiga minit kemudian.

Walaupun tidak dibolosi, namun Nor Saiful akui barisan pertahanannya perlu diperbaiki terutamanya ketika lawan melakukan serangan balas.